



鈴山堂集卷第二十五目錄

講章直解

大學衍義直解

禹貢直解

無逸殿講章



鈴山堂集卷第二十五

講章直解

文華後殿進講

大學衍義直解

伊尹作伊訓曰今王嗣厥德罔不在初立愛惟親立敬惟長始于家邦終于四海

這是商書伊訓篇伊尹以太甲繼湯之後恐其不能續修祖業作書以戒之名曰伊訓今王就指太甲嗣是繼初是即位之初伊尹與太甲說昔我成湯以德而得天下今王嗣而有之可不知所自乎其要在嗣其德焉而已况今即位之初乃王者之本天命人心

金山堂集 卷之三十一
爲之一新四方萬國望其更化所以要上繼乃祖成湯之德正在今日即位之始於此不謹其能善其終乎德者何不過愛親敬長孝弟之道便是人君於天下的人老者固無不愛而立愛之道則自吾親始如孝享宗廟悖叙九族是已長者固無不敬而立敬之道則自吾長始如篤念天顯尊事黃耆是已夫立愛惟親則凡天下之有親者莫不以我爲法而愛其親立敬惟長則凡天下之有長者莫不以我爲則而敬其長始於一家而家齊中於一國而國治終而措之四海各親其親各長其長而天下平矣此皆成湯躬

行之德而實通乎人心之所同然者也伊尹舉之以訓太甲無非欲其法祖謹初以爲出治之本而其序有不可紊者如此厥後孔子於孝經又曰不愛其親而愛他人者謂之悖德不敬其親而敬他人者謂之悖禮蓋先王有至德要道以順天下民用和睦上下無怨先聖後聖其言若出一揆由此而觀自古帝王未有舍愛敬而爲治者宋儒真德秀引此以衍大學之義此誠萬世君人者之龜鑑

董仲舒曰爲人君者正心以正朝廷正朝廷以正百官正百官以正萬民正萬民以正四方四

方正遠近莫敢不一於正而亡有邪氣好其間
是以陰陽和而風雨時群生和而萬民殖

董仲舒漢武帝時人建元初詔求直言仲舒以賢良
對策首以正心之說告武帝誠以人君居崇高之位
操威福之權一日萬機事物沓至欲一一應酬無毫
髮之差難矣其要在先正其心以正朝廷蓋朝廷者
天下之本人君者朝廷之本而心者又人君之本也
人君能正其心湛然清明不爲一毫私意所蔽則所
行的事自然皆合於理賞必當於有功刑必加於有
罪發號施令罔有不臧而朝廷正矣朝廷正則所用

的人自然皆當其才賢不肖有別君子小人不相易
位侍御僕從罔非正人而百官正矣由是達之萬民
布之四方如風之偃草如雷之動物無一處無一人
莫敢不一於正人事既正天心自協至和薰蒸無有
邪氣干乎其間是以陰陽調而風雨時群生和而萬
民殖諸福之物可致之祥莫不畢至而王道終矣夫
天之與人本同一氣人事正則正氣應之善祥之所
由集也人事不正則邪氣應之災異之所由臻也其
本在人君之一心而已臣嘗論之正心之一言誠萬
世帝王爲治之本然茫無端緒何以爲用功之地哉

惟真德秀此書發明最切其於正心之要立爲二目曰崇敬畏曰戒逸欲所謂崇敬畏者存天理之謂也所謂戒逸欲者遏人欲之謂也蓋天理之在此心日用之間本無不流通但爲私欲所蔽或聲色貨利或異端近習或讒佞邪說一有所入此心遂爲之蔽而不能祛遂爲之累而不能遣天理以漸而泯則私欲以漸而熾喜怒有偏舉措失當皆由於此夫私成於一己之微而或以貽天下之患欲遂於一時之暫而或以致無窮之憂可不懼哉臣願皇上於宮闈深邃之中心氣清明之際澄神定慮反已靜觀察天理人

欲之分致操存克治之力敬畏愈崇物欲退聽山泉以之制事以之用人酬酢萬變無往不得其正則禮祿日蕃乖異自息矣傳曰王中心無爲以守至正伸舒之言惟 聖明留意

禮踐阼篇武王踐阼三日召師尚父而問焉曰黃帝顓帝之道存乎曰在丹書王欲聞之則齋矣齋三日王端冕師尚父亦端冕奉書而入王東面而立師尚父西面道書之言曰敬勝怠者吉怠勝敬者滅義勝欲者從欲勝義者凶凡事不強則枉弗敬則不正枉者廢滅敬者萬世王

聞書之言惕若恐懼而爲戒書於席之四端爲
銘焉於几於鑑於盥盤於楹於杖於帶於履屨
於觴豆於戶牖於劔弓矛爲銘焉

這是禮記大戴禮篇載武王問道的事作者君之階
人君即位謂之踐阼師太師是官名尚父是號即太
公望爲太師而號尚父也昔武王即位之初召尚父
問黃帝顓頊之道而師尚父以載在丹書俾王爲三
日之齋端冕以迎東面以受至其所告不出敬與義
之兩言敬是嚴恭寅畏心有所存主之謂敬則萬善
俱立怠則萬善俱廢義是宰事揆物皆合天理之謂

義則理爲之主欲則物爲之主吉凶存亡之所由分
上古聖人致謹於此武王聞之惕若戒懼於几几席
楹杖觴豆諸器物之間莫不銘之以自警焉蓋恐斯
湏不存而怠與欲得乘其隙也其後孔子贊易於坤
之六二曰敬以直內義以方外神聖相傳之心法自
黃帝而武王自武王而孔子皆出一道貞德秀所以
引之著萬世帝王爲學之本也

漢文帝時賈誼爲長沙王傳歲餘文帝思誼徵
之至入見上方受釐坐宣室上因感鬼神事而
問鬼神之本誼具道所以然之故至夜半文帝

前席既罷曰吾父不見賈生自以爲過之今不及也

賈誼漢文帝時人博學多材爲長沙王大傅釐福也漢儀注祭天地五時祠還致福於天子言受神之福也宣室漢殿名前席古者君臣皆席地而坐坐久相親移席而前故曰前席昔文帝思賈誼之賢自長沙徵召入見於便殿首問鬼神之事鬼神者何陰陽二氣之靈造化之迹也帝之問及此其有意窮理之學乎誼具道所以然之故帝爲之前席聽悅其言既罷又有不及賈生之歎其必深有感於心矣然昔孔子

語季路曰未能事人焉能事鬼可見鬼神之理茫昧窈冥不可驟語誼之所對史臣不載其詞恐亦未嘗知鬼神之情狀也真德秀謂帝有窮理之心而誼無造理之學故君德成就終有愧於古然臣以謂自古帝王求賢圖治延訪諮詢必君國子民之道何至泛及於幽遠不切之務哉漢之君臣所以不及於古爲可惜也

又曰堯發乎諸侯舜興乎深山非一日而顯也蓋有漸以致之言出於已不可塞也行發於身不可掩也言行君子之所以動天地故盡小者

金山堂集 卷五 詩章 六
大謹微者著詩云惟此文王小心翼翼故堯兢
兢日行其道而舜業業日致其孝善積而名顯
德章而身尊積善在身猶日長加益而人不知
也積惡在身猶火銷膏而人不見也

這是董仲舒告武帝的言語真德秀劄其言之尤切
者著于此昔武帝上嘉唐虞欲聞大道之要仲舒對
策說道堯以唐侯而升天子之位舜耕歷山而受堯
之禪其所以致天與人歸光大明昌者非一日所能
蓋積德累善謹言慎行有漸以致之夫言行治之大
者言出於已行發於身是非得失不可掩塞易曰君

子居其室出其言善則千里之外應之出其言不善
則千里之外違之言行者君子之所以動天地也故
能盡衆小則致高大能慎至微則極著明大雅大明
之詩云惟此文王小心翼翼仲舒引此詩言文之翼
翼以見自古帝王莫不致謹於微堯兢兢戒慎日行
仁道舜業業危懼日致孝道是以善積名顯德章身
尊順天命而有天下非偶然也仲舒又言人善惡在
身其積亦各有漸積善如人形之長短自幼及壯日
以加益人不知也積惡如火銷膏日以寢滅人不見
也仲舒乃漢之儒者其告君必以堯舜使帝置仲舒

於左右丞弼之地必能以善道日陳於前繩愆糾繆格其非心安有窮奢黷武之失邪佞讒譖之惑哉惜乎武帝徒下求言之制而無聽言之實所以不及帝王之學也

玄宗明皇帝開元中謂宰相曰朕每讀書有所疑滯無從質問可選儒學之士使入內侍讀盧懷慎薦太常卿馬懷素乃以懷素爲左散騎常侍與褚無量更日侍讀每至閣門令乘肩輿以進或在別館道遠聽於宮中乘馬親送迎之待以師傅之禮

開元是唐玄宗的年號散騎常侍是唐官名主侍從獻納爲職真德秀引唐史中說玄宗皇帝開元年間謂宰相曰朕每於宮中讀書或於書中道理有所疑滯於心無從質正咨問可選文儒有學之士使入內侍讀以便顧問於是宰相盧懷慎薦太常卿馬懷素以爲左散騎常侍與右散騎常侍褚無量更日侍讀玄宗優寵二臣聽其肩輿乘馬於宮中親送迎之待以師傅之禮夫玄宗初政好學右文其盛如此可謂美矣使當時得一真儒輔導弼諧以堯舜三王之道六經孔孟之言日陳于前則明於是非邪正之辨用

舍不至於倒置聲色不至於潛移矣惜乎無量懷素
不過章句之儒帝雖有志於學而所以講明啓沃者
未至是以文物雖盛於開元而帝心已溺於燕安梨
園之樂汨亂聰明豔妃之寵蠱惑志意根本蠹而禍
亂作矣故人君之學要當以聖王爲師以治心寡慾
爲主以勤始怠終爲戒然後庶幾其有益也

大學衍義卷第五

這是大學衍義第五卷宋儒真德秀叙格物致知之
要其目曰明道術

湯誥曰惟皇上帝降衷于下民若有恒性克綏

厥猷惟后

湯誥是商書篇名成湯作此以告萬方皇字解做大
字上帝即天也衷即中也恒是常克是能綏是安猷
道也即是那人所當行之道后謂元后即人君也成
湯說惟皇上帝生此下民莫不賦之以仁義禮智信
之理渾然於中無所偏倚是所謂衷也自天所降而
言則謂之衷自人所受而言則謂之性非有二也然
天之降於人者初無智愚之間人之受於天者清濁
純駁隨其所稟有不同焉必賴君師之作修道以立
教使人順其有常之性而各安其道君臣安其義父

子安其親長幼夫婦朋友安其序別信是乃君天下之責焉故曰克綏厥猷惟后夫天能賦民以性而不能使之全其性能使人全其性者乃在乎君可見君道之重如此真德秀謂成湯此言可謂知君師之職矣厥後詩之秉彝劉子謂民受天地之中其言相繼而發皆祖於此至于孔孟性善之理益明而開萬世性學之源自成湯始嗚呼聖哉

由是觀之無惻隱之心非人也無羞惡之心非人也無辭讓之心非人也無是非之心非人也

惻隱之心仁之端也羞惡之心義之端也辭讓之心禮之端也是非之心智之端也

此自上文人皆有不忍人之心說來不忍之心即惻隱之謂孟子說凡人乍見孺子入井皆有怵惕惻隱之心由是心而觀之可見情之在人隨感而發所不能無故凡見物之可傷可痛必有惻隱之心耻己之不善憎人之不善亦必有羞惡之心解使去己推以與人亦必有辭讓之心知其善而以為是知其惡而以為非亦必有是非之心人若無此四者之心則不得謂之人矣所以明其必有也然此惻隱羞惡辭讓是非非待外求者也由仁義禮智在中故其端發見

如此仁是溫和慈愛之理仁具於中發而爲用則爲
惻隱故惻隱之心爲仁之端義是斷制裁割之理義
具於中發而爲用則爲羞惡故羞惡之心爲義之端
禮是恭敬搏節之理禮具於中發而爲用則爲辭讓
故辭讓之心爲禮之端智是分別是非之理智具於
中發而爲用則爲是非故是非之心爲智之端曰端
云者猶有物在中而不可見必因其端緒發見於外
然後可得而尋性之理無形因其情之發而性之本
然者可得而見矣使本無是理於內則何以有是端
於外哉孟子因論惻隱而悉數此四者欲人察識而
及天下耳

禹貢直解

導弱水至于合黎餘波入于流沙

這是史臣記禹濟川的事西海之山有水散渙無力
不能負芥故名弱水萬水皆能載此水獨弱而西流
其性異矣禹則導其正派至于合黎之山餘波入于
流沙之境

導黑水至于三危入于南海

金山堂集 卷之三 詩章 十一
汾關之山有水名黑水萬水皆清此水獨黑而南行
其色異矣禹又導其經流至于三危之地入于南海
之中此水之在外國者禹皆導之

導河積石至于龍門南至于華陰東至于底柱
又東至于孟津東過洛汭至于大伾北過泲水
至于大陸又北播為九河同為逆河入于海

水之在北者莫大于河也積石在金城河關縣西南
羗中龍門山名兩岸石壁峭立河出其下奔放噴薄
如雷禹則因積石導河至于龍門自北而南至于華
山之陰自南而東至于底柱又東所經則至孟津過

洛汭以及于大伾焉自東而北又過泲水至于大陸
又北所經播為九河同逆河以入于海焉九河爾雅
一曰徒駭二曰太史三曰馬頰四曰覆金五曰胡蘇
六曰簡潔七曰鈞盤八曰隔津其一則河之經流也
俱在古滄德棣州之境海水淪沒今迹不存矣

蟠冢漢漾東流為漢又東為滄浪之水過三筵
至于大別南入于江東匯澤為彭蠡東為北江
入于海

水之在南莫大于江漢也蟠冢山名在隴西郡氐道
縣漾水所出也源發蟠冢為漾至武都為漢又東流

爲滄浪之水蓋水之經歷隨地得名禹自嶓冢導漾由是東流爲漢水又東流爲滄浪三涇之水則過于大別之山南入于江東匯爲彭蠡之澤東爲北江而其流入于海矣

岷山導江東別爲沱又東至于澧過九江至于東陵東迤北會爲匯東爲中江入于海

岷山在蜀郡茂州文山縣江水所出也禹自岷山導江由是東流爲沱水又東至澧澤過九江至于巴陵之地由東迤邐而來北以會于匯東爲中江而其勢已趨于海矣九江即今之洞庭沅水漸水元水辰水

敘水酉水澧水資水湘水皆合于洞庭是名九江也夫弱水黑水外國之異水也河漢江水中國之大水也禹濬諸水各有所歸其用功先後之序如此無非行所無事爲中國之民之除害也夫豈騁其私智而爲之耶

無逸殿講章

二之日鑿冰冲冲三之日納于凌陰四之日其蚤獻羔祭韭九月肅霜十月滌場朋酒斯饗曰殺羔羊躋彼公堂稱彼兕觥萬壽無疆

這是豳風七月之詩第八章周公告成王言邠民忠

愛其君的事二之日謂斗建丑二陽之月即今十二月也變月言日言是月之日也冲冲是鑿冰之意三之日謂斗建寅三陽之月即今之正月也凌陰是水室四之日謂斗建卯四陽之月即今二月也蚤是蚤朝朋是兩尊曰朋是蜡祭之酒民間自飲之也稱是舉兕觥是酒器名古者藏冰發冰所以節陽氣薦之寢廟備君上之用也邠民當夫十二月重陰沍寒冰可取也則伐冰冲冲取之而以其時正月風未解凍冰猶可藏也則納于凌陰藏之而得其所所以勸趨冰役者何哉蓋以吾君於仲春之旦將獻羔祭韭以

薦寢廟而行啓冰之祭故先事而爲之備耳至于九月氣肅霜降十月禾稼旣登則相戒潔農場之地置朋酒之享所以速畢場功者何哉蓋以吾民感君上之恩將殺羊以獻公堂舉酒而祝無疆之壽及時而盡其誠耳周公述此欲成王知周家立國之初邠公能重民事其民感激忠愛其君如此也臣嘗因是而論之王者之治在於得民人主之心若能念念在民所欲與聚所惡勿施其心誠痛切視民如傷則百姓之心自然親附如一體今考七月之詩周之先公以農桑教民使民衣食給足周之民蒙上之教亦自力

於農桑之務以樂其生至於歲終休暇則殺羊爲酒
祝君之壽可謂上下相親之甚矣上以誠愛下下以
誠事上而兩不知其所以然此等氣象真所謂皞皞
如也周家傳世三十歷年八百蓋有由然傳曰農桑
爲王業之本先儒張栻以謂帝王所傳心法之要端
在乎此以是意而考秦漢以下事不師古治罔爲民
其治亂興替之源槩可見矣仰惟 皇上天啓聖資
卓然崛起於帝王數千百載之後而日躋聖德超然
獨步於帝王數千百載之前首重農桑敦復古道肇
開 帝苑建社稷之壇無逸有殿豳風有亭躬視稼
穡爲天下先鴻基偉構奠峙乾坤 睿藻宸章輝映
雲漢考成之日錫命諸臣燕饗以落之湛恩敷暢和
氣流通凡厥臣工丕戴夫淪肌浹髓之仁而思盡夫
手足腹心之義無疆之頌視此詩所云意豈異哉所
以登世熙皞綿祚靈長端有在矣猶願至仁不息大
德有終益懋倣勉交修之誠坐致綏來動和之効天
下臣民不勝慶幸

鈴山堂集卷之二十五

鈴山堂集卷第二十六目錄

雜文

恭題 勅諭下方

恭祭 顯陵文

衡山祭神文

賜 誥告先祖考文

焚黃告祭文

嘉林修塋畢告先考文

嘉林阡告祭眾祖文

祠堂成奉安四世神主告文

改禮部尚書告祖考文

入閣告祠堂文

生孫告祠堂文

考滿加秩告祠堂文

祭汪宗伯文

祭高都憲文

祭黎侍御文

祭內姪歐陽孺文

祭素翁文

祭安處士文

特恩堂銘

琴硯銘

鈴山堂集卷第二十六

雜文

恭題 勅諭下方

惟六年冬十有二月 制若曰 皇考顯陵遠在安陸其命工曹往加修治制視 天壽諸陵而命禮官往督禮儀之事明年夏五月臣蒿承乏禮部於是有督禮之役是秋七月己卯加上 恭睿尊謚當遣官奉謚冊香寶祝帛告于 陵當改題 家廟神位詔臣蒿兼攝以行臣聞命蹙躅夕裝兢兢靡寧是月癸巳陛辭 上授之勅賜光祿酒饌白金彩幣寶鏹為

金山堂集 卷之三 祭文
道里費甲午免朝設冊寶輿於 奉天門 上翼善
冠黃袍竚立門下司儀導臣至丹陛拜稽而行衛士
昇輿大樂前導 上注目送之百官送至 承天門
外追崇大禮也故慎重如是然斯役也例遣中貴列
侯 宸斷軼常格獨以屬之儀曹之臣惇禮省餽道
路稱忤厥聲燁燁焉厥澤滂滂焉猗歟休哉顧臣庸
不肖不克仰承休命覲冒榮遇滋媿懼云耳勅例當
進繳臣謹錄其副裝池爲軸寶藏之以茲典出後命
勅詞所未載謹拜手稽首并記於此以光昭我 皇
上聖孝傳之無窮云

恭祭 顯陵文

天眷明德佑此下人 興雖舊邦其命維新維興有
邦自 帝伊始昨壤建藩周魯是似 孝皇維兄
憲考之子維 帝仁敬睿哲溫恭恢恢淵度穆穆睟
容邇遐慕義海寓聞風純 名齋體道彌固頤晦含
章獨葆貞素在昔有言大德受命 帝不自躬儲休
啓聖明明我 后則篤其慶御曆應圖大寶以正有
開必先王業之盛舜孝終慕周典追崇顯號殊稱煥
赫穹隆松林之山冠劍攸宅春雨秋霜 宸情永惻
乃象諸陵大建廟規司空經營欽正考釐百職內外

祇役庀儀金冊玉篆螭首豐碑新宮我我鱗岬雲矗
山后獻祥川祇凝福佳哉王氣蔥蔥郁郁 帝神在
天彷彿來下玄珪衣裳雲霧風馬降觀舊都于楚之
野下土之臣瞻望靡從空聞成鼎尚擬號弓黍稷非
腆以薦微衷 帝鑒不遺繁祉是錫綏于 一人康
我兆億報德頌功配天無極

衡山祭神文

正德十四年己卯正月丙申朔越二十一日丙辰翰
林院編修嚴嵩使還廣右道出衡南敢用牲牢之奠
致祭于南嶽衡山之神曰夫有虞望秩衡已肇祀韓

子謂南方之山衡爲宗而其神獨靈夫以名山鉅嶽
昭貺妥靈宜爲人所承祀而秩號穹隆封域限隔則
非嵩之所得祀也然古之爲使者過其境得觀其山
川詢其民俗吏治矧祀禮之大乎使徒登遊是務而
展祀闕焉不幾於慢耶去歲冬嘗道祠下時以王事
未終誠積未至弗敢以瀆茲則乃以牲幣見焉者非
僭也禮也古稱人傑由於地靈周雅所載崧嶽降神
實生申甫以翰周室衡五嶽之一其高大磅礴蟠蜿
扶輿爲天地間鉅鎮固與崧並也蘊神孕秀鍾爲賢
豪以翊我國家文明之治固其時矣 天子方勤六

師有事邊徼近云駐蹕山陝之間道路傳聞晨夕憂
惕蓋朝廷者四方之極也內寧則外謐都城久虛窳
土靡固則夫上誘宸衷早返鸞輿莫安區夏神可
無意乎夫聖躬膺櫛沐之勞臣子豈自寧之日嵩
告于神者非濫也分也干冒聰明辭出悃悞惟神其
聽之

賜 誥告先祖考文

維嘉靖十二年癸巳十一月乙丑孝玄孫嵩敢昭告
于四世尊靈曰茲者 皇嗣誕生詔恩弘霈欽蒙賜
給二品誥命先祖考純德府君先考仰雲府君俱加
贈資政大夫南京吏部尚書先祖妣張氏先妣晏氏
俱加贈夫人恭惟天錫洪恩日臨長至謹以加贈祔
號改書神板奉安邸舍伏冀尊靈服茲新寵仰惟神
主遠在故鄉尚俟他日擇吉改題嵩不勝感藉追慕
之至

焚 黃告祭文

維嘉靖十五年歲次丙申正月初八日甲子孝子具
官嵩敢昭告于顯考贈資政大夫南京吏部尚書仰
雲府君顯妣贈夫人晏氏曰頃者 皇嗣誕生慶覃
宇內嵩備位留都冢卿故我先君先夫人光膺褒贈

金山堂集 卷五 祭文 四
秩號有加茲以考績過家祇奉繪書恭伸燎祭仰惟
尊靈尚克歆此不顯休命惟是孤藐祿不逮親永念
劬勞不勝感慕推咽之至

嘉林修塋畢告先考文

維嘉靖十四年十二月日孝子南京吏部尚書嚴嵩
敢昭告于先考尊靈茲者修砌先塋恭樹誥命碑文
安列石器俱已完備切惟不肖生年十六而孤閱四
十年而位至留都冢卿考績以還乃克奉 天子之
寵靈裒其祿入以舉斯役龍章赫奕泉壤增榮鶴表
巍峩江山改觀是豈不肖之能實惟我嚴訓遺慶之
所致也茲幸迄工謹以牲醴用伸告祭嵩不勝感慕
推咽之至

嘉林阡告祭衆祖文

維茲嘉林自我曾祖考重菴府君肇厝玄室其後祔
者累累歲久而叢幾至不可辨識切惟儲休委祉雖
曰先世積德之長實亦山水蘊靈之助也蒿以孤藐
裔孫頃奉先考託體于茲奈何事涉家衆修治弗時
垣甍缺隳榛莽蓬蔚每一造謁怛焉割中茲者荷蒙
聖恩追贈先考吏部尚書法得樹碑神道於是洎
吉命工芟掃蕪穢甃飾新甍特築崇塋以萃凝神秀

恭列碑表以侈揚天休仰惟先代多靈窀穸同藏享祀靡間世世子孫永有依賴茲當工役告完謹具牲醴用伸告祭伏惟冥靈鑒佑謹告

祠堂成奉安四世神主告祭文

維嘉靖十四年歲次乙未十二月二十八日甲寅孝玄孫南京吏部尚書嚴嵩敢昭告于四世尊靈曰茲者營修居第爰倣古禮崇建祠堂于正寢之東恭製神龕一座分爲五室其中一室爲先祖考妣虛位不敢設主歲時舉祀則用楮標祀以伸報本追遠之意其東第一室則奉高祖考四川右布政使平菴府君

妣夫人彭氏西第一室奉曾祖考處士重菴府君妣孺人黃氏東第二室奉祖考贈南京吏部尚書純德府君妣夫人張氏西第二室奉考贈南京吏部尚書仰雲府君妣夫人晏氏祀止四世之制蓋緣情起義兼用程朱二氏之說而修春秋享祀之儀也嵩也不肖幸賴先世餘慶以有今日然歷官三十年叨被聖恩位至二品乃能裒其祿入以舉斯禮非敢緩也蓋有待也涓今吉辰奉安神位仰惟尊靈享妥新祠鑒歆時祀永綏福祉燾佑後人嵩不勝仰藉感慕之至

金山堂集 卷之三 六
改禮部尚書兼學士告祖考文 嘉靖丙申五月

嵩以留都銓部三載考績于朝伏蒙 聖恩改授今
職切惟春卿八座崇階學士禁林華選兼此二銜之
重實為儒者之榮是皆我祖考餘慶所被也第惟不
肖屢質荒學覲冒寵靈淵冰是懼祗服先訓惟孝惟
忠靡敢失墜尚惟默相俾永有終謹告

入閣告毓慶祠堂文 嘉靖辛丑七月

玄孫以昨歲八月十五日欽奉 皇上手勅着兼武
英殿大學士內閣辦事餘官如故切惟少保孤卿官
躋一品晉隆名於秘殿參國論於台司乃儒者之至

榮人臣之極致也而况日承燕對之光時叨晉錫之
渥寵恩榮遇特冠常倫嵩非木涼德曷克臻茲蓋自
我祖宗積德百餘年而始發于吾植本固故幹之茂
發源深故流之長也追惟所自感藉奚勝仰惟先祠
遠在故鄉不克以時祭告茲遣使以香帛牲醴恭詣
里第告于毓慶祠堂伏冀先靈默相俾玄孫克修職
業篤荷天休惟忠惟孝而保令名于無窮焉嵩不勝
瞻慕激切之至謹告

生孫告毓慶祠堂文 嘉靖癸卯

嵩子世蕃以是歲五月二十九日幸生一男側室李

氏出也恭於京邸告之先靈命名曰延慶切念高行
年三十四而得子今六十四而見孫宗桃之託願觀
于成祥兆之來曷云其晚茲實惟我祖宗考妣積德
累仁之所致也謹遣人齋捧香帛牲醴之儀歸即里
第毓慶祠堂而申告焉伏惟歆鑒

考滿加秩告毓慶祠堂文

嘉靖甲辰

玄孫茲以一品再考仰荷 聖恩特降綸命加少傅
兼支大學士俸 賜誥追贈曾祖祖考皆如其官錄
廕孫紹忠為中書舍人竊惟不肖嵩起自孤童藹然
弱質不自意遭值 聖明致位宰輔湛恩優渥光顯

一門覃及六世此豈不肖不德所能皆賴我祖宗積
德深厚悠遠以式克至今日祇服寵章豈勝感慕仰
惟先祠遠在故鄉謹遣人奉香帛牲醴恭就毓慶之
堂用伸祭告伏惟先世宗親並垂歆鑒以弟五山秀
才祔食尚享

祭宗伯汪石潭文

嗚呼天之生賢謂無意耶何稟靈智之先而出凡民
之秀也謂有意耶何畀傑特之才而嗇耆老之壽也
惟公位極宗伯之官譽滿時士之口謂將經綸太平
謀謨左右而今則已矣勲業卒莫之究也如公德宇

之粹溫智識之高邁而輔以學問之醇深作為文章
其晶瑩演迤若引星辰而貫河漢其精純幽眇若陳
珪瓚而奏球琳至其析義理之微窺道德之奧則又
縹緲多轂疊疊而不竭山苞海蓄浩浩而難尋蓋大
江之西鄱湖之東自公之昆季崛起後先映發魁南
宮而首臚唱登玉署而冠詞林世之學者無間乎識
與不識比之崑山之壁河東之鳳咸慕悅而悚欽夫
何事與時違貌先年老而公乃解組投閒杜門却掃
自放於鳶山之野蘭水之濤卒使望謝安者竟莫起
東山之卧而思傳說者空擬作商室之霖嗚呼廢興
榮悴固有定數而不可易而吾儕臨風想像不能忘
情者昔忝遊從之舊有懷公之德音如玉如金誠不
覺涕下之沾襟

祭都憲高公文

吾郡先達在成化間同起鄉校嗣登進士公與蕭菴
梧岡三君子而已夫三君子者筮仕皆有閎卓之才
循良之譽颺歷中外顯位崇階無不相似若夫杖履
閒身丘園樂事壽觴宜晝錦之榮恩誥出天門之賜
晚福修齡惟公獨極其至譬則冰崖雪霰挺松栢之
後凋魯殿烟塵歸靈光之獨峙蓋公天稟完粹貴富

金山堂集 卷三十一 祭文 九
弗盈其中宇量深弘喜愠莫窺其埃斯豈偶得而倖
致也耶高也生晚粵在弱冠拜公于按蜀來歸之時
公折節忘勢弗爲後進之視而即蒙國士之知重以
令器葭莩之末常得侍几席而望履慕心親彌厚愛
父弗移乙酉之秋予赴官於國學辱在餞於江湄臨
觴繼縵命駕逶迤孰知即此而長辭也嗚呼公有遺
言託文墓石詎敢以不腆而負所期渺雲波之萬里
薦蘋藻之一卮嗚呼耆哲凋喪天不憖遺嗟斗山之
安仰悵薤露之易晞其何能止予之悲哉

祭黎侍御文

孝皇之朝獎賢思治公官內臺惟古柱史學問文章
才猷政事公實兼之克行其志冠嶽嶽擊鸞峙
出按南圻以造多士權奸擅朝否泰易世方奮而騫
中道奄躋負蓄之閔百不一試猗公之才何所弗至
其弗至者曰亦命耳乙丑之春予方筮仕京邸游從
定交伊始公誠好之遽忘其齒爰託婚姻吾女公子
二十年來縵縵靡弛予拙寡助維公是恃孰謂今者
公棄我逝展餽叙離貽書滿笥手蹟具存豈忍復視
空懷誼愛永隔生死使我涕洟悲不能止予忝國恩
擢官禮侍銜命來南山陵之使道路馳驅公私牽

制聞計逾年一奠莫致茲遣伴還薄修非祀日月不
居窳窳何似惟當勒詞執筆銘誌以報德音庶其在
此

祭內姪歐陽孺文

嘉靖甲申

嗚呼爾父爾祖兩世之祀一脉之傳惟子是屬而今
已矣嗟呼傷哉昊天不吊以至此極尚忍言哉仲春
之初爾從東井叔父偕至予邸勞苦訊問喜見顏色
然於時京城疫癘方行爾甫及門吾女屬疾爾素壯
悍迎醫視疾周旋不避篤義重親可謂賢矣詎意浹
旬之餘爾亦遘疾不起嗟呼傷哉豈世俗疫癘傳染

之說信有之耶然晉咸寧庚袞事載史傳不誣也耶
以予今歲驗之舉室皆疫吾幸無恙則是說者吾不
信也吾歷觀疫者皆由起居食飲弗慎所致爾無亦
矜壯忘戒致然邪抑自有命邪吾女之疾始者以為
常悔抹療弗亟若爾疾則醫招其良矣藥盡其方矣
殆可以無悔矣而卒亦莫之抹也繼爾而疾者僮僕
又十餘人皆未嘗藥而愈則醫師者其不足恃耶抑
古謂不藥得中醫者理可驗也嗟乎以爾祖爾父之
善仁也而殄其嗣以爾之篤義也而殞其年神理天
道則愴况茫昧而不可致詰矣三月丙寅之朔屬纊

之辰風雨晝冥氣候悽愴闔門震驚五內糜潰腸鬱
結而淚盈色慘沮而毛豎吾內則茹痛以隕心外乃
矯情以鎮物人事之可怖愕可痛戚孰有甚於此時
者乎予無強近之親無紀綱之僕以自助爾從吾久
學書頗工練事頗熟治家入都可代吾勞而今亦已
矣此事之末耳而予之情亦有不能忘焉者也茲遣
僕賃舟以女之喪爾之喪及弟維厚之喪同載以歸
爾久歷江湖素以無恐旅魂超然尚歸無滯且吾與
叔父待歸謀之伯祖謀之諸父昆弟爲爾立後承祀
以供養爾婦不至失所爾可無憂也臨發永離告以
此詞嗟乎爾安知爾姑與爾姑之夫之悲也耶爾又
安知爾東井叔父之悲也耶

祭袁翁文

去歲之冬予還里間翁來視予言笑怡愉謂翁康強
無損眠食曾未逾旬遽云屬疾壽躋大耄福履備豐
乘化翛然可謂令終鄉有善士天不憖遺告奠堂帷
吁其我悲

祭安處士文

嗟夫大化流運代謝靡停俯雲川之夕逝感露草之
朝零寓形宇內貴德與名苟所立之可述庶既遠而

金山堂集 卷之三 十一
彌馨惟君志行之超美義問之藹鬱固已滿縉紳之
譽高月旦之評矣雖乘化之奄速亦存順而沒寧我
懷其人弗履其庭託生芻以寓莫陳玄石而鑿銘亦
可慰君於冥冥也夫

特恩堂銘 有序

夫尊已之士懼以寵祿浮於行故退抑辭巽之志高
貪賢之主懼以遐邇遺其才故愛惜成就之恩至嘉
靖初載 天子選用耆哲揚于庶位高吾陳公於時
自滇臬擢長魯藩公曰臣有疾弗克事事再疏乞休
上命即安于家俟疾愈復用之外臣前無此比者

於是高吾公辭顯嗜恬厲難進之節 上崇善需舊
廣迪知之明風聲所被警動一世君子榮其事相與
名公所居之堂曰特恩而聲詩之後三年公以中丞
之節來鎮豫章嵩不佞乃作堂銘其詞曰

於惟休哉嘉靖之治日明天開百職庶工用罔非才
維時陳公寔受 上知擢正東國屏翰是資公歸卧
痾抗章謝事 上嘉曰材其未盡試亦捕掇於世豈
乏之得一棟梁詎其可遺豫章公來 藥有喜荐涉
中丞載振風紀士耻無材耻行弗厲愿 行負材有不
永譽維古用賢灼見迪知非 帝之明鑒克登茲刻

銘斯堂以載 帝德百爾有位惟君子是則

琴硯銘

其淳古可以鎮躁忘邪其清潤可以滌神悅思
舜殿之遺巧出端溪之製具二體而成用配三友而
從事携之玉堂延閣于以纂論言而裁帝制也

高麗硯銘

遼海東藩厥至孔運文明之化翊我 天朝

端石硯銘

予視篆留院大司徒全州蔣公贈是硯乃識以銘
玉堂摘文穢爾是司惟君子之貽世世其寶之

又任國學作

端貞靜疑川韞業藏圭璧其相產自南海登于上座
摘翰鑄詞金璫琳琅厥用乃昌毋利其方毋毀其剛
磨而不磷闇然日章吾將師爾以自減乎

鈴山堂集卷第二十七目錄

雜記

北上志

西使志

東觀雜志

南省志

內館志

內閣志

內閣志

東坡志林

東坡志林

鈴山堂集卷第二十七

雜記

北上志

予卧痾鈴山閱八稔正德丙子春三月疾愈治裝將
如京師前期文告先墓廿有五日啓行時郡守
徐侯璉縣令蕭侯時賓戒舟爲送是日晨雨如注午
雨少歇登舟縣寮屬暨親友暨家族長少咸餞于鮑
江之亭始去鄉邑有離別惘惘之思焉二十六日早
發雲日澄朗江流盛漲風順舟駛午次白漢舅氏庄
宿別二十七日過楊津訪宗羅諸姻楚蒙侍御以舟

來逆至新喻士友雜沓來訪留二日是日立夏驟暄
詰旦風橫作更復寒凜舟行二十里次嚴家渡憇焉
晡時風息楚蒙舟送至此乃別晚行二十里宿安和
三十日過羅溪訪同年胡子明秋官宅午次劉家陂
易氏親邀餞陸行十五里至其家四月朔日還舟風
阻泊泗溪二日初三日次臨江奚二守鉞傳侍御冠
卿黃大參文繡孫太守朝望李大尹文振符進士宜
臣會餞于瀟灘驛風雨淒橫留二宿初六日風順過
豐城晚晴至曲江登江天閣有李子獻吉刻詩觀之
初七日過市汊驛至南浦驛都憲孫公璩方伯張公

嶺王公啓方大參璘羅少參中胡憲副鉞王憲僉疇
鄭戶部玉蔣工部愷以次來訪旦詣 府朝有燕午
飯于同年勤甫田公提學分司十三日早發謝貢士
應和表秀才爵舟送至雙港楊樹湖田舍距城二十
里矣午次趙家隈舟人謂候曉乃可踰湖遂止宿焉
十四日曉行湖中並湖多洲洲間生青篔簹長數寸舟
人競採之淹為菹絕香美自此挽舟逆流至鄔子驛
過余家埠岸傍古樹青茂連陰數里清流映帶可愛
晚宿烏江口十五日次龍津驛即餘干河口憲副許
公本謙司允運於此來訪晚宿黃丘舖十六日次安

仁湍水淺涸易小舟行十里至石港宿十七日次貴溪十八日次弋陽方伯安福伍公朝信時赴閩任聯舟行是日過石潭汪氏里第同年有之貢士邀伍公與予觴于第二十日過叫巖寺艤舟觀之寺鑿巖而屋巖石壁立由寺西扳磴盤折而上甚峻後枕崇岡爲汪氏先塋踰嶺而北爲閣老費公家塋一大山下支嶺蜿蜒出田畝間爲高都憲家塋皆往觀之諸山起伏奔躍峯巒特秀大江逶迤徑巖麓渟洄而去有石起江心俗名捲績石信天設竒勝也有之送予至此而別自此行十里江畔有樓名嘉會乃閣老費公里第登岸尋徑謁公欸語抵暮乃還舟二十一日次鉛山河口伍公自此登陸之鉛山入閩與予別二十一日次廣信費太史子和李侍御子芳偕會時旱涸議當陸行予見四山雲合若將雨狀索小舟旦發小雨行三里野泊雨終夕翌日抵懷玉矣因歎人事通塞不可料如此同年曹瑞卿二守方旱禱憂惕遣詩慰之二十四日憇玉山館是日離家一月矣二十五日過山微雨頗涼道中青苗遍野時時徑松林間陰蔚可愛飯草坪驛未刻至常山錢令憲來迓生員胡鑑達等來見二十六日登舟雨行五十里至板巖宿

二十七日風順辰至衢州與鄭守璠會驛下遂飲同年劉太守彥明郡齋二十八日經龍游縣至蘭谿縣連日析數小舟行沙湍間此縣江水稍深衍有官艦頗鉅載之晨謁章楓山先生乃行晚次富春驛五月初一日四鼓發舟風順經七里灘望嚴陵釣臺過桐廬縣晚抵富陽縣初二日渡錢塘江憇浙江驛舟載家具入水關予陸行入鳳山門至城中館于市民金廷秀家內監王堂晁進崔瑤侍御鮮巡按冕趙巡鹽春林戶部大輅方伯任公鑑湯公沐大參潘公鐸周公曾少參楊公清憲使李公承勛憲副馬公卿憲僉

許公讚胡公訓都閩陳君璠張君浩申君錫杭守梁君材運使吳君大有皆來訪始食黃魚即石首鱖也鮮時其色如金初五日陳都帥璠邀予與戴刑部時宗林饒州城爲泛浦之集同年謝太史以中寓南關外訪之翌日三司諸公招飲三茆觀予辭不赴旦出城次吳山驛登舟初七日早食發舟次塘西宿初八日過崇德縣縣令洪異廣人治縣有稱初九日早次嘉興取道如松江訪三汀陸太史雨行夜至嘉善縣初十日微雨晚抵松十一日侯二守景德邀集崇谿書院復集同年陶員外良伯第十二日同年丁別駕

文範以舟至唐橋宴別夜分抵上海縣境遲明至浦東陸太史里第去縣治尚三里同年宋戶部義卿督稅于此越江來會有鄞士碧谿張鈇能詩同集是日風雨坐覺凜肅乃知海國夏寒如此十四日早渡江入上海縣訪諸舊識遂行義卿舟送三十里至龍華寺宴別夜行月色如晝四鼓泊松城下三汀碧溪二君送予至此而別郡僚暨孫太史徵甫張給舍時行吳工部子儀及良伯諸君偕餞于問俗亭下良伯又餞而前晚宿魏塘十七日還至嘉興李太守道甫劉二守應徵夜餞于驛十八日午發次黃江涇十九日

雷雨早過平望驛過吳江縣晚至蘇城外胥門驛同年孫侍御夔卿徐郡伯朝儀遣義官吳完來治舟謝工部廷瑞顏二守如瓌李吳縣經沈方伯良臣各來訪少傅守溪王公里第有怡老園山池甚勝招予飲徐公招餞于鶴山書院顏二守餞于州宅留凡五日以待舟故二十六日過楓橋學士陳子雨先生宅遂至滸市王戶部誇來訪連日溽暑如焚晚雨困暍稍紓二十七日過望亭晚次無錫謁二泉邵先生二十八日次常州同年徐侍御子謙適清戎至餞予毘陵驛是日小暑節二十九日次丹陽三十日過同年許

補之侍御宅晚至鎮江六月初一日風靜渡江波平
如鏡予拏小舟獨遊金山登留雲吞海之亭坐聽潮
軒中僧饋蔬食酌中冷泉淪信茗飲之風味殊絕還
舟至瓜步初二日次揚州都憲藍公章王侍御金汪
主事淳皆來訪初四日易親可範邀飲于觀音堂巷
之寓舍是日與嶽弟別過邵伯驛夜行湖中大雷電
以風初五日辰過高郵晚泊槐角樓鎮濱湖石岸陡
峻風雨橫作舟震盪衝擊與石鬪兩宿皆值惡境情
甚湮鬱夜分雨止風息天明順風踰湖二十里抵寶
應初六日午至淮陰驛總漕都憲叢公蘭鎮遠顧侯

士隆張刑部璿孫戶部泰皆來訪初七日泊淮安西
湖風橫力行夜至板閘劉戶部友仁來訪初八日過
清江廠王工部鏃葉戶部天球來訪風逆宿浦口初
九日渡河風愈逆挽舟力行至清口驛宿連日風橫
淮水漲溢瀕河民舍滄沒茫無畔岸旅泊甚惡初十
日風逆磯水湍悍自清口挽舟力行十五里至湖城
鎮夜中月色甚清臨江蕭生俊劉生寵偶值會宿差
一慰十一日風息行四十里至桃源縣未至五里一
僕喪買棺殯之驛丞朱良豐城人以醫士朱文來饋
藥安東縣於此協濟人夫夜辛戶部東山來泊十二

日早發桃源夜乘月行三鼓抵宿遷縣十三日早發宿遷未刻過直河驛復一僕喪倉卒藁葬之夜四鼓至邳州時毒暑蒸鬱二僕暴卒以疫舟人怖甚予鎮以無懼督舟疾馳市香薰解毒諸劑煮而遍飲之幸無恙然觸暑携家可爲永戒也十四日中官進楊梅舟泊邳城下索夫銀橫甚州官皆匿同年索戶部遜夫來訪久之知州高巖來乃得數夫行沿途漕舟鱗集時時突冒叫囂行甚艱十五日次房村驛踰呂梁十六日踰徐州洪管洪陳工部輔遣醫餽藥小雨宿洪河口十七日泊徐州漕廳下瀾望巨浸渺然廖工

部維脩王戶部國寶陳兵備和皆越江來訪十八日午發至茶城野泊十九日風順過境山過來溝驛夜抵沛縣二十日風順過沙河驛過孟陽八里灣諸閘宿南陽閘二十一日過棗林諸閘泊趙村閘煩暑夜不能寐五鼓啓閘行至濟寧泊南城驛下總河工侍趙公來訪同年李工部希獻及饒郡汪節推希周偶值聯舟行二十二日次大長溝獲麟古渡二十三日晨雨稍涼朱戶部寅留分署小飲即行晡過袁家口閘同年孟望之侍御謫令汶上以公事適至秉燭觴語夜分乃別二十四日過安山驛至安平鎮二十五

金山堂集 卷之三 雜言 十一
日次東昌二十六日次臨清原兵備軒部署茅貢劉
寅蘇輔何文邦皆來訪大熱夜驟風雨二十九日立
秋風雨發臨清時衛水驟漲黃流湍悍兩河漕舟鱗
集予所乘舟敝朽而舟卒駑往往觸撞呼號險怖爲
甚午過渡口驛晡至甲馬營驛七月初一日曉霧過
梁家庄驛至德州初二日過良店驛午過連窩驛夜
行次新橋驛予舟不能進李汪二君遣卒秉炬來逆
初三日過磚河驛過興濟縣晚行未及青縣二里忽
驟風雨舟不及維繫纜一短柳間危怖達旦至青縣
李汪二君迎勞相慶如更生初四日過流河驛風逆

湍悍舟時時迴狀盤旋不能行晚力行至靜海縣初
五日五鼓行過楊青驛至天津汪戶部希會邀集初
六日過丁字沽風逆且憇且行至桃花口宿初七日
過楊村驛有寇焚劫近村民家予等泊北蔡村不敢
行更番坐警達旦初八日至河西務翟戶部鵬邀集
初九日雨宿和合驛初十日搬淺野宿此地多寇十
一日午至張家灣十四日入都城凡在途三月餘災
暑鬱蒸憂悸萬狀古謂路難信哉瞻望觀闕於五
雲之表平生知舊執手契闊之餘於是亦少慰云

西使志

正德十三年秋 冊封諸 宗藩正副使各十三員
予充副使同正使建平伯高霽如廣西 靖江府先
是有 孝貞皇太后之喪 上皆素服避殿輟視朝
及是虞祔畢始從古典七月三日庚子告 廟傳制
晡時鳴鼓 駕陞殿方闢門忽大雨如注朝臣立東
角門趨趨不前衛士督趣就班雨益驟庭中皆水拜
興無序未及宣 制衛卒舁寶輿出夜深黑喧闐如
沸予出東長安門水深尺餘僕馬皆失與吳仁甫翰
檢徒行至禮部兩靴為水所浸坐門下脫靴傾水扭
鞮復穿濕靴詣禮侍王甌濱先生廂房得袷裘易濕
衣疑齋王少宰同使事亦至取酒各手數杯領冊歸
舍已二鼓矣辛丑諸使出城壬寅夜大雨癸卯黎明
復雨雨止予始啓行顧官諭九和陸太史子淵柴給
事德美邀予同俞國昌大叅餞于崇文門外太史劉
應占舒國裳崔來鳳又餞而前泥淖行甚艱晚憇通
州察院家人昏黑乃至行李夫舁各不相及比旦勒
州夫送之稍稍俱集督磚華工部湘來訪工侍趙公
汪侍御景顏各遣卒護送甲辰登舟乙巳城中人來
云 車駕將北巡召內閣書勅九卿科道官伏左順
門下哭留予歎駭久之申刻發舟行二里至長店止

宿建平高公待予於此丙午晨發經和合驛灤縣官
送夫皂既而輒逸去夜至河西務王尸部廷珪遲明
來訪曉雨午晴次楊村驛戊申風順午至天津胡兵
備被逮去衛官匿索夫不得此地皆戎籍無民差頑
獷素然管倉郁戶部深來訪己酉小雨發天津二里
過建平親識苑舉家飲晚晴至楊青驛宿草間多蚊
撲面嗜膚拂之不去竟夕目不交睫四更時雨啓行
次奉新驛蒸熱暴雨復霽次長屯宿辛亥五鼓行過
流河驛驛前湍流洄洑舟盪兀不可定晚行二鼓抵
興濟縣乾寧驛驛空舍間無一人岸傍人云驛官妻

匿民舍樓中堅壁不出慰諭之乃以空頭印紙關文
縋而下久之得夫甲妻組繫之乃始得夫壬子曉行
午次滄洲宿癸丑晨過磚河驛風順次新橋驛甲寅
次連窩驛夜分月色如晝乙卯晨過安陵巡司午過
良店驛晚行將及德州二十里許日沒昏黑捧夫穿
柳林中蒙密錯忤咫尺不辨有數槩船奕奕下江中
人語暗寂火光時隱見頗疑有異逾時月出漸高驛
官秉燭來迓次德州漏下廿刻矣丙辰早食發德州
晚次故城縣泊梁家莊驛驛疲供億官以印納州去
夜半漕運都憲臧公舟至胥會乘月起行丁巳風逆

挽舟且行且泊午次鄭家口宿連日煩暑蒸鬱戊午
小雨食頃雨益橫風色寒凜河流洄洑行甚艱力行
至甲馬營宿已未過武城訪王純甫吏部過渡口驛
宿朱家園庚申至臨清部署高君尚賢蕭君廷傑胡
君大全蕭君孟景兵備李憲副師儒方刑部思道閻
吉士尚友秦進士祐皆來會此地南北要衝素號難
治吳守嘉聰鴈門人精悍有幹稱先是傳言 車駕
將幸此州州民携挈爲避徙計有司亦夙戒供具以
俟蓋郡邑繹騷比比然壬戌發臨清過青陽驛夜至
梁家鄉聞癸亥次東昌訪故提學敖公靜之之家一

孫江郡學生所居土屋二間詢之許太史思仁云公
自翰林出副憲皆無貴者然諸子頗習侈靡公亡家
遂落予昔爲諸生蒙恩最厚求公墳在城西遠不可
拜泫然涕下而已晚行三十里周家店宿甲子風逆
過七級阿城荆門諸關過安平鎮沿途漕舟及蘇常
糧艘叢雜行甚艱棘乙丑過安山驛驛屬兗府東平
州州治距河十二里以老人領夫皂於此接迓夜宿
靳家口丙寅辰過開河驛野多牛羊馬驢市積魚稻
過分水廟廟前兩水分流皆就下此地獨隆然高南
北各十里置閘閘啓水泄則舟淺閣民舟壅滯有留

數日者管閘工部主事李瑜自此入南旺湖並湖兩堤垂柳離立陰鬱可翫湖中蒲葦彌望漁罾者網者簦簞者舴艋而遊者矍而泊者蓬倚而飯者歷歷如畫會湖南運殿材巨楠數千株聯筏曳旗蔽流而上楠最碩者圍丈餘長可五十尺誠天地間奇產然此木一株山伐陸輓水運至此費數百金矣丁卯午次濟寧葉工部珩來訪州人馬宣舊仕吾邑簿致仕家居訪之八月朔日戊辰發濟寧河水滄漲閘皆漫徑月河行過魯橋閘宿南陽閘己巳風逆次八里灣遇閘大叅正甫過沙河驛宿廟道口庚午晨過沛縣遙

見江上黃旗 御舟二艘有司宿戒以備巡幸者過夾溝驛微雨晚行至境山宿辛未五鼓行六十里天明至徐州大水浸民廬舍泊漕運廳下遇同年俞僉憲子宜俞云曹太僕汝學同行昨午先發予惜不及會寄以詩署州事胡二守堯元管洪陸工部金管倉康戶部浩蔣戶部彬徐人趙昌齡馬宗周皆渡江來訪午發次呂梁踰洪宿驛下壬申風橫留飲陳工部憲觀物亭中午行至新安驛宿癸酉經邳州至直河驛宿甲戌過宿遷縣至崔鎮店宿桃源縣吏卒來候乙亥過桃源縣風逆晚次清河舟已泊適風少息舟

人謂可渡河鳴櫓換柁下中流如飛河流濫溢無際
入淮河口驚喜交集雖幸就平安而實冒險可懼哉
丙子過清江浦午次淮陰驛都憲叢公臧公總兵顧
侯丁戶部致祥周刑部鎬薛守鑿來訪予皆報謁過
同年胡重器僉憲及杜舉人瀾家丁丑發淮陰行廿
里遇蔡衡仲太史飲舟中風靜過寶應湖水天一色
空曩無際漁艇上下波中飄浮若飛有巨網列晒如
林橫洲渚間宛見圖畫過槐角樓鎮風急水湧石岸
礚礚不可住撐舟行十里許入港乃即安流月波相
盪夜景澄明夜半至界首驛宿戊寅次高郵遇吳戶

部杜同泊州守朱良州判楊節來見行廿里遇袁衛
漕船鄉人競至相慰勞石揮使方留酌因止宿焉夜
半月出乃行己卯過邵伯途間禾黍盈疇蕎麥綴花
甚秀到此始是江南景矣將至揚州十里許河水涸
運舟商船叢集且歇且行良久乃得渡泊廣陵驛楊
侍御朝鳳劉節推一正沙憲副立之安黃門汝礪謝
生時濟會驛下辛巳如儀真夜分乃至王都帥佐會
舟中甲申發儀真復從故道至瓜州盤壩乙酉渡江
入京口陸侍御行之遣舟送予夜行黎明次丹陽葉
侍御志來訪夜至毘陵驛丁亥問道如江陰訪故工

部郎中曹公家公宰吾邑有遺愛子進士弘毅之子友也發舟出西水門溪港支錯行野田間禾黍蘆叢菽菽有聲秋思益清行達旦抵江陰曾令棠張少叅允敬蔣進士虞中皆會觴于驛夜行五十里達旦至曹公里第拜夫人于堂毅之前數日如蘇城不及會予即辭行庚寅晨至無錫遂行晚次澹市辛卯次蘇州徐郡伯朝儀顏二守如瓌部使朱袞黃景星同年袁戶部經皆會甲午小雨泊月舟亭下崦西徐侍讀王子貞中舍携酒來毅之亦會予於此聯舟信宿是日別晚至吳江乙未過平望夜至嘉興丙申夜至

林丁酉過崇德夜至德新關戊戌擬壩次吳山驛入城次武林驛三司諸公來訪九月朔日己亥藩臬郡公醲燕都司之後堂杭守留公克全丁二守文範同年也邀遊西湖庚子早出湧金門憇洪氏兩山書院小飲數行乃登舟緣蘇堤歷孤山岳墳觀大佛寺至寶叔塔抵暮而返辛丑出城至浙江驛登舟風順夜至富陽壬寅晚至桐廬癸卯過嚴陵祠登之讀湛子祠記晚至嚴州鄉里胡少參斯靜朱憲僉克諧二公行部於此偕來訪自桐廬至此灘石悍激水清駛見底易小舟翌午始行乙巳午至蘭谿遣吏如金華訊

東陽二尹叔丈翌午吏回太守歐陽賜之遣使致書
魏丙午至龍游是日重九以詩寄楊節推時明丁未
衢守李遜卿郡齋留集戊申晚泊常山河口詰旦登
岸飲同年吳侍御德輝察院庚戌晚次玉山王甌濱
禮侍吳仁甫太史使益藩先後偕至會于此辛亥
留玉山分守少參許公劾廉招予飲時父旱谿涸登
陸如廣信壬子至廣信守巡劉大叅文莊王憲僉崇
仁駐此偕會王吳二先生於此取道龍虎山赴益予
往拜閣老費公乃行癸丑次傍羅口甲寅次弋陽宿
小翁乙卯次貴溪黃太史慎卿夏大行公謹畢工部

汝霖同集時溪水涸淺范尹汝和假予官艦僉議不
可行夜中風雨凄橫新漲湍汨灘稜俱沒中流自在
不費推移亦偶然之幸也丁巳晨過安仁晚將至龍
津廿里野泊戊午早至龍津驛饒郡二守錢汝和署
餘干縣來致燕餞宿驛下己未至鄔子驛庚申過湖
至趙家隈辛酉至南昌又五日而抵家

東觀雜志

正德十二年丁丑正月朔早西北風寒勁晝晴是歲
當天下朝覲晡時鳴鼓至一更初朝散朝臣吏卒
相失譟聲如沸有官被踐死午門外初二日有旨

金山堂集 卷之三十一 雜言 十一
如南海觀獵在都城南七里召府部大臣科道官甚
急十三日祀南郊畢畋于南海夜漏下十刻 駕還
宮翌日慶成宴晡時始宴宴畢月已高矣八月一日
車駕出次昌平轉通州霸上畋南海十三日還廿
八日 駕復出九月一日次宣府十一月廿九日長
至 駕在宣府是日百官詣奉天門行五拜三叩頭
禮先後雜至班行斷續司儀者不問正德十三年戊
寅正月朔日 駕在宣府百官行禮如長至皆不賀
節早西北風薄寒晝晴 駕將還京有 旨頒賜廷
臣服色初五日司禮監官於左順門唱名頒給內閣

斗牛二品皆蟒三品皆飛魚四品及翰林學士至侍
讀皆麒麟五品堂官六科長皆獅翰林史官給事中
郎中員外郎皆鹿計五千疋有奇可謂章服之濫惟
御史豸初六日 駕次懷來城七日早晦百官出德
勝門候 駕皆服所賜服色緋金倚殺大帶加帽予
與劉編修元隆獨青衣同官頗誚讓之晡時 駕至
文武大臣具彩障製文跪道左捧觴稱賀大雪漏下
廿刻 駕還宮蓋自去秋八月廿八日至今四閱月
矣八日大雪九日 駕出齋宮十日大祀畢遂如南
海觀獵十一日夜二鼓 駕還十二日慶成夜分乃

金華山堂集 卷之三十一 祭言 十一
宴廿日賜廷臣以南海所獲麋兔廿一日召廷臣觀
所獲夷物頒賞大臣并科道官銀牌內閣金牌此答
醵金製綵稱賀者他官未預賀者不及是日申刻
上單騎馳出德勝門去矣從騎惟四人餘以次追去
二月十日 太皇太后崩逝十二日聞喪為始十三
日百官素服黑帶詣清寧宮門外聽遺誥時 駕在
宣府是日早晴辰刻忽大雪交下已而復晴巳刻
駕還未刻宣遺誥畢十四日如前儀十五日成服百
官各斬衰杖朝夕哭臨三日四月初七日風霾晝翳
日色白暈無光六月十二日 大行梓宮發引 上

從至昌平廿四日 大行神主祔廟早晴陪祭執事
官候于廟西初刻 上至甫降輦升階及門忽大雷
電雨如注燈燭昏滅朝臣衛士奔走避雨班行淆亂
禮儀廢省聊取終事而已七月初三日傳 制行冊
封禮予受命如廣西靖江是月 車駕復出明年巳
卯有寧藩之變

南省志

正德十二年丁丑禮部當會試以考試官請二月六
日命下大學士戒菴靳公少詹學士東江顧公為考
試官予叨與同考是日午刻儀部主事倪本端以幣

金山堂集 卷二十七 雜言
至予家初七日陞辭宴禮部入院復宴至公堂乃鎖院入簾八日出初場題晡時主考二公遍視各同考房滅火局吏于房內乃偕詣聚奎堂序坐故事主考上坐同考翰林年深二人前對坐餘皆傍坐是歲二公特請前席四人滕子冲洗馬崔子鍾侍讀陸子淵編修而予亦與焉揭書出題畢即付工刻且刻且印不停手各色匠厨人役釜竈食飲諸物畢具一堂燈燭輝映煬燎薰炙予等坐達旦疲甚用黃紙書進呈題納筒裹以黃袱五鼓擊板揭簾大宗伯至立簾下距內文餘執事者以筒授宗伯捧而出不交一言禮

部提調官領題出散諸士予等乃揖而退蓋嚴密如此十一日出二場題十四日出三場題皆如之初十日戌時分初場數卷入十一日數十卷入後乃漸多詩房共卷一千四百予房南一百二十五卷後取十四北一百十三卷後取九中四十卷後取三共二百七十八卷共取二十六名十六日午時二場卷入十九日寅時三場卷入閱卷至廿四日畢廿五日各房以所取卷俱呈主考看詳批定名次成草榜午刻知貢舉禮部二公監試二侍御皆入序坐主考同禮部四公上坐二侍御前對坐提調官以墨卷入各同考

金山堂集 卷三十一 一
先生以所取硃卷對號卷堆積諸箱搜閱甚艱偶一號不對即棄不敢取五經置朱箱五三場取中對號俱同取中者納諸箱主考知貢舉監試官各用封紙署判貯堂中廿六日拆卷填乙榜廿七日填正榜以第十七名爲始填畢又以第六名爲始填至第十六名既乃拆五魁每拆一卷唱名衆共稱爲佳士然後取者乃自慰予謂有司求士之切甚於士之求知於有司也榜成已暮乃宴宴畢退舍束裝京師人以報榜希厚利先賂印匠多印試錄名紙伺啓闈得紙疾馳去報早則金多亦有惡少伺于途挺什其人奪紙

以去者夜二鼓門伺者久不勝忿則擲瓦石以入比出問者驩譟擁試官馬途塞不得行劉舜臣給事被擁逼墮馬深塹中此甚危惡每歲常然亦不能禁也
三鼓抵舍旦陛見賜宴禮部廿九日謝恩

內館志

正德丁丑十一月二十一日予受命教內館初六日入館故事詣崇聖堂謁先聖畢升堂內侍諸生行四拜禮皆立受司禮諸中貴散居十門各遣學長致刺不親往司禮執筆者九人居河濱各親往具贄帕投刺帕皆辭是日提督解太監銘具宴其後銘奉使代

者李英英執筆代者張準與予先後同事者編脩陸子淵劉華甫孫遠宗尹舜弼劉元隆檢討邊汝明

鈴山堂集卷第二十七

鈴山堂集卷第二十八目錄

神道碑銘

墓誌銘

明故光祿大夫太子太保南京兵部尚書贈少保謚端敏秦公神道碑銘

明故太子少保禮部尚書贈太子太保謚莊簡李公墓誌銘

明故資政大夫刑部尚書贈太子太保謚康敏趙公墓誌銘

封通議大夫南京吏部右侍郎洞雲先生張公神道碑銘

都察院右副都御史高公墓誌銘

高公墓誌銘

李公墓誌銘

鈐山堂集卷第二十八

神道碑銘 墓誌銘

明故光祿大夫太子太保南京兵部尚書贈少保謚端敏秦公神道碑銘

嘉靖甲辰正月廿有一日尚書鳳山公薨于第計聞上震悼輟視朝一日下所司議祭葬如例既乃贈少保賜謚端敏制得村碑神道於是公之子都事沐以文請於予予往與公同仕兩京幾二十年道義交相好也其奚可以辭按狀公諱金字國聲常之無錫人也系出宋國史院編修直龍圖閣少游先生觀之

後先生坐黨籍屢徙道卒葬高郵其子湛倅常州遷葬錫之璨山因家焉遂爲無錫秦氏公生而穎異過人弱冠舉應天鄉薦弘治癸丑登進士第授戶部福建司主事監督倉場糧斛差檢勘順天災傷融敏精幹即斬然頽脫矣總視諸司章奏事無難易摹畫悉當遷貢外郎郎中丁父憂起復除郎正德間宦戚奏乞鹽引每從中報下阻商耗邊鹽法幾壞公當署堅奏格之擢河南按察副使督學政當是時中州之士出公門多顯者初公同邑邵文莊公督學有聲至是人則稱秦邵云陞左叅政分守大梁道劉賊起略河

洛間將薄封丘公設法防禦會叅將宋振提師南下因邀與合陣遇賊于陳橋奮擊大破之士人立祠祀公陞山東布政右使尋轉左使擢都察院右副都御史巡撫湖廣至則屬地方連年大水饑饉公蠲租賑濟察罷貪吏上便宜八事再上十事其書在國史以文多不載又盜賊數起公擒賀璋廖琪于江討猺傘于彬桂平叛苗于香爐峯民賴以寧宸濠變起車駕南征諸宦寺權要人並緣爲姦橫求有司權勢赫壓公抗奏却之諸求少戢在楚餘七年威讜惠流績譽大振嘉靖初拜戶部右侍郎改吏部尋轉戶左是

時公攝部篆清理皇莊整飭鹽法申鹽引前禁督追
逋負蓋公既習知諸務而益殫厥心力補弊興滯榮
然改觀焉錄彬桂諸平賊功陞子錦衣百戶世襲公
辭乃詔進俸賜白金彩幣拜南京禮部尚書旋改南
兵部尚書叅贊機務不踰年召爲戶部尚書條奏國
儲數事今尚循守不變丁亥年六十有一上疏乞歸
賜璽書乘傳歸命有司歲給輿隸朝臣自宰執臺
諫皆以公行能最高年又未艾不宜苟遂其退請留
公不報公既歸言者不止復起爲南京戶部尚書
廟工興改工部尚書加太子少保尋加太子太保再

改南京兵部尚書以年七十告謝再疏甚力上知
不可留溫詔賜歸仍給輿廩如初公平平生志務經世
博極天下之故識達時變而守之以正平居溫溫樂
易當其職守毫髮不可奪歷兩都五部卿正忠勤一
節雖退老猶慮切天下事性寡嗜好焚香一室左右
圖史自娛親課諸孫學業知舊問遺手自勒狀作家
乘建四代瑩域築祠祀淮海先生配以先世有德者
四人名曰五先生祠以風示族里蓋巋然鉅公長者
矣爲詩文純雅可誦所著有鳳山詩集撫湖政要安
楚錄雜著稿臺省奏議諸疏類稿多梓行于世曾祖

金川堂集 卷之三 三
諱物初祖諱景薰父諱震皆累贈至太子太保南京
兵部尚書妣皆一品夫人配鈕氏累封一品夫人子
二人長泮鄉貢士先卒次汴廕授南京後軍都督府
都事其葬之月日與子姓媼媾之詳具在太宗伯費
公誌中茲不著著公之大者以書諸墓上之石而系
以銘曰

秦肇龍圖有斐令德文實擅宋名廼齊軾用弗究施
卒死於謫天祐善人懿爾孫子凝凝尚書廼誕厥祉
十世而發振其家祀始仕爲郎今問孔揚允文允武
何用弗臧教被中土多士斯皇河洛之墟大盜披攘

舍爾鳴鐸干戈用張訖誅叛亂封丘之陽爰自旬宣
以撫荆楚豹服有韜錫以鉞斧熊旂烏章寔總貔貅
彼蠢有昏負是采阻三犁逆巢民有寧宇惟是楚人
式歌以舞 天子召之卿貳即序敷政優優不吐不
茹歷正諸曹鞠躬盡瘁未老告休逝其與處廷有興
論列疏留公歸而再起勳望益隆仍司邦計復典司
空保釐舊京宮保加崇公再歸矣第祿康矣耆德壽
俊民之望矣俄焉長逝乃盡傷矣崇階美謚稽實易
名高朗令終世莫與倫其倫惟何山甫其人夙夜匪
懈明哲保身陳詞著德以刻穹珉厥聲鴻鴻百世孔

振

明故太子少保禮部尚書贈太子太保謚莊簡

李公墓誌銘

正德間公為禮部尚書掌通政司事嘗因天變上勤政事戒逸遊重爵賞抑奔競四事不報自是公決意求退章六上皆有旨慰留之最後請益力乃報可特加太子少保歲給輿皂仍賜勅給驛以歸於時建中稱歎謂有急流勇退之風厥後權奸竊柄逆濛搆亂乘輿數出大臣恟恟危懼始皆服公之先見云公卽家餘二十年年八十有五景泰丙子正月元日為公

之生其卒嘉靖庚子五月五日也計聞今上皇帝

詔有司給祭葬如例又特贈公太子太保賜謚莊簡

嗚呼若公蓋清德懿行鉅公者矣公諱浩字師孟

姓李氏世為山西曲沃人以書經舉成化癸卯鄉薦

明年登進士第初授都水主事管呂梁洪故有役夫

數千辦樁草銀錢歲若干緡公至悉罷之止令於農

隙採辦備用而已署鄰巨豪伺官府短長前任者多

為所持獨於公不敢近改戶部主事丁父憂服闋改

兵部車駕主事陞員外郎奉勅清理畿內諸土田奪

豪右侵佔者若十頃還之民陞職方郎中為尚書鈞

陽馬公所稱重委攝諸司章奏冊封代府溧陽王
充副使凡所餽贈拒弗受陞通政司右叅議轉左叅
議持節充正使封晉府雲丘王歷陞左右通政順天
府尹時久旱疏論畿甸民所疾苦事當罷行者詔嘉
納之逆瑾擅政無名需求甚急公一切裁抑數與面
議可否侃侃不阿聞者頸縮而公不爲沮瑾乃日使
偵公過失然竟無所得也居二年改通政司使轉兵
部右侍郎尋轉左兼理武職貼黃嘗攝工部篆修朝
陽門城垣通州新城公咸督其工乃疏慎郊圻固封
守革冗費修戰具數事多見採納以山東盜平陞俸

一級賜白金彩幣丁繼母許淑人喪賜祭葬給驛以
歸服闋召拜禮部尚書仍掌通政司事食一品俸賜
金綺斗牛服色未幾疏乞去位公去後臺諫累疏薦
公當復用而公已老無意於世矣公器宇魁岸論議
偉出雖退處丘園每聞朝廷一善政輒喜見顏色篤
厚倫理有弟客死收恤其孤如已子歲時事先必謹
著家訓以示子孫雖隆貴自奉無異寒素好學問文
章雖老不勌所著有南莊稿歸田集藏於家曾祖諱
思賢祖諱齡考諱禎高密縣丞皆累贈通議大夫兵
部左侍郎祖妣賀妣鄭皆贈淑人配因氏累封淑人

贈夫人子男四長曰金即弟死撫爲已子者也任爲
宜君知縣次鏞河南道監察御史次鎮國子生次鈞
秦府左長史孫男六承光承德承華承詔承賜承寵
孫女六曾孫二曾孫女六御史君以辛丑某月日葬
公于某山之原而奉狀屬嵩以銘嵩昔在翰林嘗得
望見公之顏色公得謝歸實賦詩以道公之行者茲
重以御史君請銘奚以辭銘曰

公生有徵吉夢是占厥夢維何有遺之衡公沒不亡
去而上昇又曷徵之群鶴降迎維古異人發祥匪偶
受氣取精亦孔之厚屹屹李公三晉所鍾含和蘊靈
令德在躬祇事 三后荐登八座大受之用罄無不
可乾崇適隳大阿倒持衆懷睢盱獨炳先幾揚策都
門脫屣名路鴻飛冥冥弋者何慕既壽而康天歸百
祥澤不永施厥後乃昌佳城鬱鬱其藏有石勒銘告
幽以示無極

明故資政大夫刑部尚書贈太子太保謚康敏

趙公墓誌銘

今上即位之初疇咨雋賢登于大僚維時趙公以茂
德耆望簡在帝心擢南京刑部尚書尋召掌北曹公
抗顏執憲棘棘無少避雖微有窒迂而勁正不回無

何引疾乞休詞極懇切 上重違其志詔給驛以歸
有司具輿皂月廩皆逾恒品陛辭 上複製古體詩
十韻親灑宸翰以賜大臣謝事得賜詩近所未有蓋
異數云九廟成詔進階榮祿大夫備禮存問公優游
林下享年八十有四以嘉靖丁酉七月九日卒計聞
贈太子太保謚康敏遣官營兆恩禮備至可謂榮名
完節福履令終者矣公諱鑑字克正青州壽光人也
幼從父隸籍京衛遭母喪歸免喪為學宮弟子舉山
東鄉薦登成化丁未進士授知蕭山縣在縣廉愛有
惠政去後民思祠之擢監察御史歷視馬政鹽法奉

命按宣大時虜酋火篩犯境朝命平江伯陳銳等帥
兵討之師久不進公疏劾之又陳方畧甚悉於是兵
將奮勇連戰皆捷虜為遯去公為御史久數推京寺
要職值逆瑾用事出公知安慶府旋改順德府瑾誅
乃擢浙江叅政陝西右布政進右副都御史巡撫甘
肅歲大侵公疏請出內帑賑之及貸富人貨緡易粟
隨所在給以粥食全活甚衆又令官給牛種勸之使
耕次年遂大穰又浚渠招屯募民益兵邊務大修又
却吐蕃復哈密奪地璽書嘉勞改視南京院事復命
理閩浙鹽法入視院事轉大理卿公於法比素精覈

而宅心平恕為刑書會其治諸巨文種種按伏咸得其情逆濠之變宗室坐繫者眾公躡止坐元惡請釋其株逮者以故獲全者二百餘人一日待漏直廬朝士有恃寵徑入託之私者公叱之曰此豈汝寄請地耶聲色俱厲聞者壯之公素性好士樂善雖面折不能容人之過而怒過弗藏故人弗怨之臨事決議能以二三語折衷靡不服學士石熊峯稱之曰清梗忠實時以為實紀云祖諱鐸考諱福累贈如公官妣李氏贈夫人元配劉氏繼許氏贈封皆夫人子男二長岳以蔭歷官都勻知府次岳國子生女四適孔淮韓

元佑鮑文臣李洞予昔官南京翰林公折行輩禮之至是太守君書來屬為銘曰公之遺命也嗟乎豈以予為知公者哉然不可辭序而系之銘曰
侂侂司寇履方蹈古止色廟堂孰余敢侮人亦有言
侂直罕容道行志得惟 聖之逢公疏引年翩其解
組 帝曰嘻哉去我賢輔陸有秉傳廷有賜詩 皇
眷優常聞者嗟咨卹典責終易名節惠吁嗟良哲可
式有位

封通議大夫南京吏部右侍郎洞雲先生張公

神道碑銘

洞雲先生既葬之二年今少宰公貽書其友嵩曰邦
竒不類少也未嘗一日就外傳大人授之經始學爲
文擊節擴塞俾知向方有所過僻因事示戒徐誘而
默喻之及既仕猶然夫蓼我九我教不與焉若邦竒
則罔極之痛尚何言維墓碑有文焯德發潛垂世弗
朽者惟子是託矣嵩謝非其人蓋閱歲而督命益嚴
廼考次行錄得先生治身行己之悉而謹志其大者
序而揭諸墓序曰先生諱時敏字日新姓張氏寧波
鄞人也聰明沉厚毅然不苟戲笑早入縣庠通易詩
二經遠近爭迎以爲師慕聞來學造就日衆少宰公
親承指授陶鎔淬濯遂大成其器文聲重館閣而先
生屢試有司輒弗偶其內修之行既足稱于家邦而
世之有權力聲氣者知先生莫能深故卒以窮始先
生以爲君子之學要自期於古人立身如程明道濟
世如韓魏公范文正公避俗如陶靖節自約如馬少
游恒舉以爲法讀書匪尚博識經史要語切於心身
者書諸楹壁而時觀之允迪之蓋先生所自志者如
此其於世俗得喪歡戚不以屑意也先生弘裕以容
衆矜嚴以正物全已以守貞純儉以存戒謂鈍爲利
謂拙爲巧謂朴爲華凡先生之行已居鄉及所以淑

其子者皆出於長厚誠恕足以平怨釋欲革檢亡伎
消鄙敦薄挽末俗進之古可謂淑人君子者矣先生
博極羣藝陰陽星曆山經地志姑布子卿之術靡不
通曉然鮮言之為詩冲澹和平所著洞雲稿藏于家
初以少宰公貴封翰林院檢討繼加四品風憲服郊
恩進封通議大夫南京吏部右侍郎先生素志經濟
及受封則絕意世故日與親舊觴詠自適於溪山雲
月之間享榮養者二十有五年年七十有二嘉靖辛
卯二月甲申以疾卒 上聞賜諭祭命有司營葬事
乃以是年十二月丙申葬于葑港祖塋之次祖諱純
父諱忱贈如先生官配沈氏封孺人進封淑人生子
二邦彥惠而蚤卒次即少宰公次邦韶邦禮側室董
出女二學生裘穆徐榭壻也孫男子中子釋子兆子
望嵩聞諸古之士學成而道德明秀則進為公卿大
夫暨百官之選其後國論不及乎里巷之隱士之修
已者恒詘於程試之文顧以先生之材與行而不見
知遇不克少施于時則為善者何以勉焉雖然乃有
今少宰公有道而文為時名卿嗚呼蘊必發其在茲
乎序而系之銘其詞曰

崑岡之璞瑜瑾內全瑩瑩精氣浮于山川徂徠之松

金山堂集 卷之三
礫砢千尺凌傲雪霜其姿鬱鬱胡不珪璜薦之清廟
胡不棟梁于彼鴻構猗嗟先生行古道方材宏莫用
匿耀含章惟其不有以惠後昆是生少宰實大其門
過庭受誨匪色匪言如彼蒙泉弗汨其源渾渾其積
蔚蔚其宣文世宗之行世儀之惟其身教式穀似之
天曹嚴嚴百辟具瞻甄別賢類以贊化元猗嗟先生
迹晦道光為不自躬厥 彌長榮莫與夷眉壽多祉
湛恩洪龐未見其涖刻詩墓門以詔來禩

通議大夫都察院右副都御史高公墓誌銘

嘉靖己丑三月一日都察院右副都御史仰峯先生

高公卒于家惟國家於大臣之終具有卹典於是有
詔命有司營葬仍命官諭祭如制是年十月某日葬
公于里澤埽子祉貽書京師以公遺言謂嵩使誌諸
墓始公識嵩於諸生中薦寵之頃被召國學公送之
彬江之滸執手語曰吾老矣不及見子墓石之文惟
子是託也嗟乎予曷可以不銘公哉予又曷忍銘公
也哉謹按公諱琬字德資成化戊子占江西鄉試戊
戌登進士歷知松陽上海二縣召為南京貴州道監
察御史陞松江知府陝西湖廣叅政右布政浙江左
布政已而拜右副都御史撫治鄖陽公器貌端重為

政矜嚴持大體曉達民事慎飭名檢所至舉其職而上海松江之政尤稱最上海公屬邑也地大賦繁公至減官糧加耗奏以餘糧編銀顧夫民稱省便官稅徵解歲有羨餘數百金前政者例受之公初不入于心則斥以建學舍齋閣解字館傳之敝圯者鋤抑豪強發摘姦伏屢辨疑獄終其任無敢行以私聞公喪即日奔歸民懷慕齋餽追至其家一峻拒之爲御史風裁凜峻出按蜀戎籍持平不苛稽審有法衆號得體適松守缺松人咸願得公爲守語聞吏部以公往蓋公前在上海威信既孚於民又熟其利病及爲郡益邁往踔厲凡所興革弛張舉措務建經久長利期無遺便乃已用文學飭吏治考大成之樂間詣學宮飲射讀法率學官弟子親爲講說課試高等者慰寵之飭陸宣公周文襄之祠表忠節貞孝百廢具興松故饒財俗尚侈靡公身爲儉約先之食不重肉客至豆觴魚鱠果脯一飯而已禁饗燕俳優雜劇不一陳於前考公所爲庶幾君子德義之風矣撫卹時劇寇劉七猖獗連河鄧襄蜀數州患之都御史彭公澤專總制公受勅調漢土兵併力追勦計畫勞勩渠黨就獲璽書獎勵有襲衣白金之賜衆方多其功顧爲言

者所抑得旨召公將別用之公還過家即卧不復仕矣有司議平賊功猶以白金彩幣即其家賜焉今上登極推恩廷臣公雖家卧援比以請詔賜誥進階通議大夫祖諱原亨考連江丞諱仕忠皆贈通議大夫都察院右副都御史祖妣某氏妣胡氏皆贈淑人蓋異數云家居十有五年年八十有五履行重一時前後部使數致粟帛禮於其廬高氏之先出安成之篔橋有諱隆者來家宜春與中表劉以文厚善以文無嗣隆以次子原亨嗣之遂冒劉姓即公之祖也公三世皆仍姓劉嘉靖壬午社領鄉薦會試禮部始以公意疏于朝復姓高公篤倫理伯兄琦弟璨友愛甚至舊田宅悉推與之而別創以付社等從兄孟寬客遊湖湘卒遺孤禧公撫之如子宦邸與社就外傳長娶以室服用惟均禧今聽選監生其他親族賴公賑贍殯厝尤衆顧自公視之皆常行不及悉書也公元配戚氏繼王氏皆贈封淑人子男四長即社次陰陽訓科祚次祐蚤卒次楓女適都御史張公鳳子汝功指揮使石公方次子宮俱國學生孫一人曰元銘曰抑抑高公維行之持螯彼玉雪弗受磷緇爬梳濯濡威惠並施厥政在民既去而思位方日融器也大受

退處而休厥用弗究公雖告休受寵無已金幣誥書
即命于第考終大耋福履具完 皇有異恩賁于九
原納銘昭德以告弗諉

鈴山堂集卷第二十八

